

13. oktober 2015

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutigaa Nunat Avannarliit Killiit aalisarnerup iluani naalakkersuinikkut suleqatigiinneq nukittorsaqqullugu Nunat Avannarliit Killiit aalisagaqarfissuunerata iluaqtissartaata atorluarneratigut. Aalisarnerup iluani suleqatigiinnerup qanoq iliorluni annertusarneqarsinnaanera qulaajaqqullugu nunani taakkunani pingasuni naalakkersuisunut inassutigineqarpoq misissuinerullu inernerinik ataatsimut Nunat Avannarliit Killiit Siunnersuisoqatigiiffiannut nassuiaateqarlutik. Sammisani ukunani qulequttat qulaajaavigineqarsinnaasut:

- **Susassaqarfimmi aalisarnermut tunngassuteqartumi maannakkut suleqatigiinneq pillugu nalunaarsuiffik**
- **Aalisarnermi isumalluutit aqunneqarneranni suleqatigiinnissamut periarfissat**
- **Nunarsuarmi immikkoortoq namminerisamik ataatsimoorussamik nittarsaassutitaasaaq imaluunniit ilisarnaaserneqassaaq aalisakkanillu tunisassianik tuniniaavittarluni**
- **Immami ilisimatusaatitut misissuinermi suleqatigiinnissamut periarfissat**
- **Avatangiisinik attanneqarsinnaasumillu atuinermit takutitsisumik nalunaarsuineq**
- **EU-mut niuerfinnilu allani tuniniaavinnut iserniarnermut annertunerusumik suleqatigiilernerup iluaqtissartai ajoqtissartaalu**
- **Susassaqarfimmi aalisarnermut tunngasumi naalakkersuinikkut ataatsimoorussinissamut ataatsimoorussamillu isumaqatigiissusiornissamut periarfissat**
- **Nunat taakku pingasut aalisarnermi ataatsimut ingerlatsinermikkut nakooqutiginnaasaannik takutitsisumik nalunaarsuineq.**

(Aallartitat siulittaasuat Lars-Emil Johansen)

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutaat Nunat Avannarliit Killiit aalisarnerup iluani naalakkersuinikkut suleqatigiinnerup nukittorsarneqarnissaanik sammititaq Siumumiit imaattumik oqaaseqarfigissavarput.

Nunatsinni inuussutissarsiutitta aningaasarsiutittalu pingaarnersaat tassaavoq aalisarnerup. Nunanilu Avannarlerni Killerni suliffissuaqarnikkut pingaarnarpaatut aalisakkanik nioqutissiorneq aamma inissisimasuuvoq. Allatut oqaatigalugu: Kalaallit Nunaata, Islandip Savalimmiullu aalisakkanik nioqutissiorneq aningaasaqarniarnerannut pingaarnarpaatut inissisimavoq.

Nunarput, Island Savalimmiullu nunarsuarmi imartat anginerpaat ilaanni avannaata kitaani inissisimasuupput. Nunatut ataasiakkaatut aalisarnerup sapinngisamik inuiannut pitsaarnarpaamik iluaqtissanngortinnissaa qulakkeersimaneqartariaqarpoq, taamaattorli imartatsinni pisuussutit ataatsimoorussamik siunniussat pillugit periusissiaqarata.

Siumumiit Nunat Avannarliit Killiit Siunnersuisoqatigiiffiannit oqariartuut, tassalu nunat taakku pingasut assigiinngitsutigut arlalitsigut suleqatigiillutik aalisarnerup iluani periuseqalernermikkut aningaasaqarnikkut iluaqusiisumik kinguneqarsinnaasoq isumaqatiginartissinnaavarput.

Aalisarnerummi silarsuaani qangaaniilli aalisakkat Atlantikup avannaani issittup imartaani aalisarfiit pitsaanerpaaneersut qanoq nunat taakkua pingasut akornanni ataatsimoorussamik naalakkersuinikkut politikkeqarfigineqarnissaat ujartuiffiginiarneqarmat Siumumiit iluarisimaarparput. Silap pissusaatami allanngornerata ilaatigut kinguneraa imartatsinni aalisakkat “nutaat” takkussornerat, taamaattumillu aalisarneq pillugu ilisimatusarnerit siunissami aamma suli annertusiartorsinnaanerata naatsorsuutigineqartariaqarluni.

Nunat Avannarliit Killiit imartaat ataatsimut isigalugu uumassuilinnik nalituunik annertoorujusuarnik pisuussuteqarpoq, ilaatigut issittumi aalisarfiit pitsaanerpaat pigineqarlutik kiisalu aalisakkanik tukertitsineq pitsaassuseqarluartoq ingerlanneqarluni.

Taamaattumik aalisarnerup ullumikkornit suli annertunerusumik iluaqutissanngortinneqarnissaannik siunertaqartumik Nunat Avannarliit Killiit siunnersuisoqatigiiffiata kaammattuutaa, tassalu Nunat Avannarliit Killiit aalisarnerup iluani naalakkersuinikkut suleqatigiinnerup nukittorsarneqarnissaa, kiisalu qanoq iliorluni suleqatigiinnerup annertusarneqarsinnaanerata qulaajarneqarnissaanik aalajangiiffigisassatut siunnersuut Siumumiit taperseratsigu matumani oqaatigissavarput.

Taamatut Siumumiit akuersaartumik oqaaseqarluta siunnersuutip Aalisarnermut,- Piniarnermut Nunalerinermullu Ataatsimiititaliami aappassaaneerneqartinnagu suliarineqarnissaa inassutigaarput.

Anders Olsen, Siumut